



Arkivnr: 2016/4906-2
Saksbehandlar: Sissel Øverdal

Saksframlegg

Saksgang

Utval	Saknr.	Møtedato
Yrkesopplæringsnemnda		25.05.2016
Utval for opplæring og helse		02.06.2016
Fylkestinget		14.06.2016

Reglement for Yrkesopplæringsnemnda

Samandrag

Hordaland fylkeskommune har ikkje eit eige reglement for Yrkesopplæringsnemnda. Dette har blitt tatt opp av nemnda hausten 2015, og fylkesrådmannen har funne det riktig at det vert utarbeidd eige reglement for yrkesopplæringsnemnda.

Forslag til innstilling

Fylkesrådmannen rår til at reglement for yrkesopplæringsnemnda vert vedtatt slik det går fram av saksutgreiinga.

Rune Haugsdal
fylkesrådmann

Svein Heggheim
fylkesdirektør opplæring

Saksframlegget er godkjent elektronisk og har derfor inga underskrift.

Vedlegg:

1. Brev til fylkesutvalet frå LO og NHO
2. Delegasjonsreglement for Hordaland fylkeskommune, utdrag frå delegasjon etter opplæringslova.
3. Ansvar og myndighet i Rogaland fylkeskommune, reglement for yrkesopplæringsnemnda.

Fylkesrådmannen, 13.05.2016

Fylkesrådmannen viser til brev til fylkesutvalet frå LO og NHO om reglement og vedtaksmynde for Yrkesopplæringsnemnda, vedlegg 1. Behovet for eige reglement for Yrkesopplæringsnemnda blei sakshandsama av Yrkesopplæringsnemnda i sak 32/15 (30.11.2015) der nemnda slutta seg til innspelet frå LO og NHO.

Generelt om delegasjon

Fylkestinget er det øvste og styrande organet i fylkeskommunen. All mynde i fylkeskommunen ligg i utgangspunktet i fylkestinget. Underliggjande organ må få mynde delegert dersom fylkestinget ynskjer at organet skal utøve mynde, jf. § 6.

Rett til vidaredelegering er regulert i kommunelova. I nokre høve er delegering også regulert gjennom særlovene som opplæringslova. Fylkestinget kan delegere mynde, med unntak av nokre saker til folkevalde organ (jf. § 10.2) og til fylkesordførar (jf. § 9) og fylkesrådmann (jf. § 23.4) i saker av ikkje prinsipiell tyding. Det delegerande organet kan ikkje delegere frå seg ansvaret for dei vedtaka som vert fatta.

Vurdering

I delegasjonsreglementet for Hordaland fylkeskommune (2014/15940-7; rev. 27.10.15) er fylkesrådmannen delegert mynde m.a.

- a) til å gjere den faglege vurderinga av bedrifter i høve godkjenning eller tap av godkjenning (jf. § 4-3),
- b) fullmakt til å godkjenne og samtykke i endring og heving av lærekontrakt og opplæringskontrakt (jf. §§ 4-5, 4-6)
- c) fullmakt til å nemne opp prøvenemnder (jf. §4-8). For nærare informasjon, sjå vedlegg 2.

Yrkesopplæringsnemnda viser til reglement for Yrkesopplæringsnemnda i Rogaland fylkeskommune og ber om at Hordaland fylkeskommune bruker denne som utgangspunkt, sjå vedlegg 3. Fylkesrådmannen har i sitt framlegg til reglement for Yrkesopplæringsnemnda i Hordaland fylkeskommune tatt omsyn til dette innspelet frå nemnda i den grad gjeldande lovverk og eige delegasjonsreglement gir rom for det.

Fylkesutvalet har i møte i desember 2015 oppnemnt ei gruppe som skal gjennomgå og vurdere endringar i delegasjonsreglementet til Hordaland fylkeskommune (2014/15940-4). Det vert teke sikte på å leggje fram revidert delegasjonsreglement hausten 2016. Reglement for Yrkesopplæringsnemnda vil kunne inngå i dette revisjonsarbeidet.

Forslag til reglement for yrkesopplæringsnemnda

Yrkesopplæringsnemnda skal føre tilsyn med bedriftsopplæringa i Hordaland.

Yrkesopplæringsnemnda har eit utviklingsansvar, og skal ta initiativ til å fremje fagopplæring i arbeidslivet. Yrkesopplæringsnemnda er rådgivar for styresmaktene i fylket når det gjeld opplæring i fag under opplæringslova. Dette gjeld opplæring i bedrift og i skule. Nemnda har også ei viktig oppgåve med å informere skuleelevar om dei mulighetene som ligg i ei fagutdanning.

Yrkesopplæringsnemnda er sett saman av politikarar og representantar frå arbeidslivet.

1. Samansetjing

Fylkestinget nemner opp Yrkesopplæringsnemnda med oppgåver etter §§ 4-3, 12-3 og 12-4 i lov om grunnskulen og den vidaregåande opplæringa (opplæringslova) av 17.07.1998 nr. 61.

Nemnda skal ha medlemmer som til saman har brei innsikt i heile fag- og yrkesopplæringa og i nærings- og sysselsetjingsspørsmål.

Etter vedtak i fylkestinget 27.10.15 i sak 84/2015 skal Yrkesopplæringsnemnda i Hordaland ha 9 medlemmer med personlege varamedlemmer. 3 medlemmer skal nemnast opp etter forslag frå arbeidstakar-

organisasjonane, 2 frå NHO, 1 frå KS, 2 frå fylkestinget og 1 elev-/lærling-/lærekandidatrepresentant. Funksjonstida til nemnda er den same som for fylkestinget. Lærlingrepresentanten vert oppnemnd for to år om gongen.

Nemnda vel sjølv leiar og nestleiar, jf. opplæringslova § 12-3.

2. Oppgåver

Ansvarsområde og arbeidsoppgåver for Yrkesopplæringsnemnda er gitt i opplæringslova §§ 4-3, 4-8 og 12-4 og forskrifta kapittel 11.

Yrkesopplæringsnemnda skal innan sitt saksområde arbeide med:

- å fremje innstilling til organisering, arbeidsmåtar og strategiar
- å vurdere og uttale seg om rutinar i fylkeskommunen
- å vurdere korleis partane i arbeidslivet skal bidra til kvalitetsutvikling og –sikring
- å vurdere korleis samhandlinga mellom skular og lærebedrifter kan betrast
- å vurdere korleis kompetanseutvikling kan sikrast
- å arbeide for best mogleg dimensjonering av vidaregåande opplæring og gi råd om tiltak
- å arbeide for best mogleg rådgjeving og foreslå tiltak
- å gi råd om samhandling mellom skular og bedrifter for å medverke til regional utvikling

Saker der Yrkesopplæringsnemnda gjev tilråding:

Dette gjeld m.a. saker som:

- saker som har følgjer for fag- og yrkesopplæringa
- fylkeskommunen sitt system for fag- og yrkesopplæring
- godkjenning av lærebedrifter jf § 4-3, forskrifta § 11-1
- tap av godkjenning jf § 4-3, forskrifta § 11-5
- oppnemning av prøvenemnder og yrkesutval, jf. § 4-8

Ved godkjenning og tap av godkjenning for lærebedrifter skal fylkeskommunen leggje avgjerande vekt på den faglege vurderinga til nemnda.

Saker der Yrkesopplæringsnemnda har avgjerdsmynde

- Saker som fylkeskommunale organ delegerer til Yrkesopplæringsnemnda.

Fråsegner

- Yrkesopplæringsnemnda kan på vegne av nemnda gje sjølvstendige fråsegner innan sitt arbeidsområde, både til fylkeskommunale organ og eksterne organ.

3. Arbeidsform

Yrkesopplæringsnemnda har til vanleg møte om lag ei veke i forkant av møta i utval for opplæring og helse.

4. Sakshandsaming

For Yrkesopplæringsnemnda gjeld reglement for sakshandsaming så langt det passar. Fylkesrådmannen førebur sakene nemnda skal behandle.